

L'Rauraque.

Nôs dgens s'leudgînt mitnaint dains ène bâme. Lai r'viere était preutche, c'était soê po s'nenttayie, pe po trouaie è boire. Les pus aidgiles aivînt meinme aippris è aitraippaie quéques grôs pouêchons, traites, boétchats, cârpes qu'naidgînt vés lai rive d'lai r'viere, en les pregnant d'aivô lai main dôs les roétches, obîn en les échoûerbaint d'in bon côp d' soûeta. Des aîges, ès n'en aivînt p'in grôs moncé. Bîn chur qu'èls étînt en l'aissôte d'lai pieudje, d'l'ouêraidge. L' tchâtemps, è f'sait bon frât dains lai bâme. En huvie, lai bije n'y tirait p' taint l'ouêre.

Chutôt, è fayait mitnaint rôlaie bîn grant po tcheussie les grôsses bêtes qu'bèyînt taint de boinne tchie è maindgie. Les tcheussous r'venyînt s'vent bredoéyes d'lai tcheusse. Sains répét, nôs dgens s'd'vînt moinnaie pyain contre les loups qu'rôlînt âtoué d'lai bâme en tcheusse de p'têtes bêtes, de yievres, de raits è d' âtres tchaitis-gairiats.

Po aichurie lai nonne, l'pus s'vent po aivoi in pô âtche è maindgie, les fannes è les afaints daivînt reuguenaiie dains lai côte djainqu'â soi po tieudre des sâvaïdges fruts. Les afaints rentrînt bîn chur d'aivô l'ventre pus piein qu'yote cratte. In djoué qu'sôle, lai p'tête Djeânne était d'moérée en d'rie, èlle s'airrâté tot ébabi. Drie in p'tchus, dôs ène béche roétche, èlle aivait vu dous djûenes loups qu'djôtînt ensoinne d'vaint yote terrie, bîn coitchis dains lai r'venûe. Els étînt che bés, è s'sâtînt d'tchus, ès f'sînt totes soûetches de bostiules en s'moûejéyaint les arayes. Cobîn d'temps qu' s'était péssé dâs qu'èlle les beûyait d'aivô ses dous grôs écaïrqueyies l'eûyes, èlle n'en saivait trop ran. Tiaïnd qu'èlle oyé les évoues d'sai mère, èlle se tchissé sains brut dôs les aîbras po r'veni vés les âtres dgens. Son échpèce de cratte était empie pieinne è boûetche-tiu d'in mâchat de p'téts fruts, de feuyes è pe d'épainnes. Lai rotte r'venié en lai bâme. E n'y aivait quasi ran po lai moirande. Ci soi-li, Djeânne aivait mâ, son échtomaic s'toûejait dains son ventre, tiaïnd qu'èlle se coutché d'aivô les âtres. Bîn â tchâd, tot contre sai mère, Djeânne é t'aivu di mâ d' s'endreami. Elle s'musait en ces dous aimiâlous p'téts loups, che djôtous. Elle se raivisait les raïcontes des véyes d'lai rotte, lai yutte qu'èls daivînt moinnaie contre les loups, métchainnes bêtes qu'an n'saivait p'aitraippaie foûeche qu'ès laïncînt, pe qu'lai croûeye moûejure ât quasi âch' daïndg'rouse que ç'té d'l'oué. El était craibîn méneût, tiaïnd qu'dains in sondge, lai baich'natte çhaitait yun des dous tchiâs.

Tos les djoués qu'cheûyainnent, en coitchatte, Djeânne r'venié vés l'terrie. C'était aidé di meinme. Tiaïnd qu'le soraye se y'vait drie lai grej'niere, lai manman loup soûetchait di terrie bîntôt cheuyée des dous tchiâs. Po s' désentmi, ès r'pregnînt yôs djûes, yos caboltiules. Lai mère ne rébiait djemais d' les loitchie chus tot l'coue. Pe v'niait lai tassie. Mon Dûe, qué dédjunon. Les dous djûenes n'râtînt p' de péssaie d'ène tchitche en ène âtre. An airait dit qu'ès v'lînt maindgie yote mère. Pe, sôles, ès s'endreamînt.

Tiaïnd qu'le soraye était drie le grôs tchêne, lai mère ravoétait tot âtoué en feûnaint, pe èlle paitchait tot d'pai lée. Elle ne r'veniait qu'tiaïnd qu'le soraye péssait d'rie lai grante fuatte. Les p'téts s'botînt è djaïppaie tiaïnd qu'èlle yos aïppoétchait ène yievre obîn ène âtre bête. Es tirînt â pus foûe yote nonne poi lai tête, poi les paittes, poi lai quoûe. Tiaïnd qu'è n'yi d'moérait pus ran è maindgie, les trâs bêtes s'coutchînt yenne â long d' l'âtre. Tot comptant les djûenes s'endreamînt, mains lai mère voidgeait aidé les eûyes in pô euvies!

In bé djoué, c'ment d'aivéje lai mère loup tchitté ses p'téts, mains l'soraye aivait dj' péssaie dâs grant d'rie lai fuatte qu'èlle ne r'venié p' encoé. Les p'téts allint de drète à gâtche en pûeraint. D' grôsses laïgres rôlînnent chus les djoûes de Djeânne.

L'cheûyaint djoué, lai mère n'était p' li tiaïnd qu'les dous tchiâs paitchainnent tot d'pai yos di terrie. Djeânne aittendé grant, mains lai manman loup ne v'nié p'. Qu'ât-c' que s'était péssé? L'djoué d'aïprés, ç' feut encoé pé. C'ment ène aîme en poinne, l' pus grôs des dous tchiâs f'sait l' toé di d'vaint l'heus di terrie en djaïppaint, en pûeraint, en raïlaint. E r'veniait aidé vés

lai gâtche di terrie, feûnait en grulaint in réchte de noire pée, pe se r'botait è pûeraie. Djeânne eut vite fait d'compâre, èlle ôyait son p'tét tiûere que friait bin foûe. Lai mère ne r'verait djemais pus, le pus p'tét des tchiâs était moue, è moitie dévouèrè poi ènne âtre féroce bête. D'sai p'tête douçatte voix, lai baîchatte boussé quéques p'téts l'évoues. An airait dit ènne tchainson. Pe, tot balement èlle se y've d'rie les foidgieres. Le tchiâ s'enfeut dains l'terrie. Elle aittendé ènne boussiante, pe s'aivaincé in pô pus. Le tchiâ r'venié en pûeraint, s'airrâté d'vaint lai roétche. Tendaint lai main d'vaint lée, Djeânne f'sé ènne pèssèe d'pus, aidé en boussaint son p'tét l'évoue. Le tchiâ feûné è drète, è gâtche, pe r'paitché s'coitchie. E r'venié è piait ventre, ses dous grôs môs l'eûyes ravoétaint trichtement l'afaint. E s'aippreché encoé in pô pus. Son meûté n'feut bîntôt pus qu'è ènne pèsse, pe è ènne d'mé-pèsse d' l'eûvie main d'lai baîch'natte. Aidé, Djeanne tchainsonnait son redyîndiat. Le tchiâ tiré lai landye que toutché lai main d' l'afaint. E s'aivaincé in pô encoé, moûdjyè lai main pe lai loitché. D' l'âtre main, lai baich'natte çhaité lai p'tête tête d'lai bête qu'se r'yevé fraintch'ment d'vaint d'se blôtti contre lée.

Hèyèrouse, Djeânne pèssé ses mains chus tot l'coue di p'tét loup en l'embraissaint. Pe, l'pregnaint dains ses bras, èlle ritté vés lai bâme.

C'était l'premie côp qu'nôs dgens aipprévèjînt ènne sâvaidge bête. Djeanne l'aipplé « Rauraque ».

Tos les afaints v'lînt djûre d'aivô le p'tét loup, mains è r'veniait aidé vès lai p'tête Djeanne. Ebâbis, les dgens d'lai rotte n'en r'venyînt p'. Le tiûere di pére de Djeânne s'étrouinait, taint èl aivait bèyie de dus côps chus sai fêye po qu'èlle se n' sâveuche pe, aidé, laivoû qu'è n' saivait p'. Meinme le tchéf d'lai rote s'musait: nôs les hannes, nôs s'craiyîns foûes, mains nôs n'ains djemais poyu faire ç' que ç'te p'tête baîchatte é fait en n'ôyaint qu' l'aippeul de son tiûere. Le soi, aiprés qu' an eut bin maindgie di cie qu'les tcheussous aivînt poéyu aitraipaie, qu' le « Rauraque » aivait l'ventre bin piein, Djeânne sietée d'aivô son p'tét loup ch' les dg'nonyes â moitan di çhaçe de dgens, ècmencé sai raiconte: « In djoué qu'i tieûyôs des p'téts fruts d'aivô mai mère, ... ».

J-M. Moine

* * * * *